

萬善花室文集

仙山塵夢圖序

吾友楊子劭起以所作仙山塵夢圖照相示命系以序余  
觀其爲圖也繪翠一闌縹紅十尺裁瓊鎖軸鏤壁簪楣展  
芬溢指舒藻悅魂瑠樓曲曲天桃結牆雕扉重重垂楊縮  
鑰甲朝未起風迴小苑之東午夜初陰人在闌干之北加  
以春凝裾遠月擁鬢來浣紗湖畔背手微吟姑射山頭顰  
眉善怨羅塵滿鞦映蓮花之一叢細骨牽裳賜眞珠之百  
琲天孫織館海燕窺梁王母歌臺青鸞奏曲珍之所萃中  
有人焉斂襟彩逸珂帽神清籤書成城抽毫列岫龍團茶  
冷漱玉無聲鵲尾香沈裊霞如縷掃花圍裊雜舜華之佩

丸墨盈斗譜石黛之歌芙蓉腕底淺拂雲箋翡翠簾前代  
融匳管不日不月云誰之思是耶非耶願我則笑幻哉斯  
境麗矣其仙夫解纒結言悲懷故宇含波通素寄心君王  
本以緣情隱關綺語織縑初罷誰察雙蛾學繡未成難工  
巧笑影形羞並榛苓有思蹇修不來菘菹盈室同心離疏  
莫憐瓊瑋閨中邃遠空獻明璫碧蟾炯炯忽悟前身丹螭  
遽遽或能先覺是知同遊洛浦歎瑤佩之終虛久謁臨邛  
感鳴琴之難遇既遺世其若塵定傾城而獨立此卽圖之  
所由作也余惟徘徊日暮窈窕年華攬明鏡於中懷恨瀛  
臺之易隔迴腸九折敢寫相思有美一人忍與終古掩卷

默契况若有亡誰能西歸牽裳恐阻攜珠盤於逝水悲蛭  
翼於中途請質斯言爲君增意

萬善花室文彙卷一終

萬善花室文藁卷三

大興方

春暮遊陶園序

晉陵多陂池竹木之勝而西南之濱尤饒逸致碧流三尺紅芷百尋郭穉接天檐牙隱樹早畦未翦菜香襲衣遠隴相環麥秀成浪時值春寒芳桃滿枝忽聞鳥聲落葉盈陌十里五里飛花有臺朝陽夕陽遊絲互路修葉櫛比中通廣橋循橋而行迺得名迹是曰陶園蓋唐先生荆川讀書之館也後歸陶氏遂以陶名韋負之宅人識其故居鄭公之鄉名成於舊德虬壁當戶椒墀爲徑廣不百步遽止十

丈重籬拂雲皆成喬木曲沼引岫通於迴溪藤陰蟠空全  
蔽日月蒼筱鳴籟雜以風雨崇埜如掌分泰岱之一隅礫  
石若拳鬱蛟龍之萬變是則竟日而往莫測其幽極目而  
觀未究其勝者矣余惟息居多暇遊襟思曠良朋相攜好  
風與俱騁足於芳浦稅駕乎茲園顧盼亭皋之外偃泊虹  
霞之中踈苔列砌晚蘭障袂高論布響泉嘶於山狂歌乍  
興室忘其主蓋自若木之旭迨乎玉繩之低濟禽求宿宛  
變羣呼潛鱗戢遊晻映爭彩於是析軫舊轍停策還途惟  
舒贖之旣窮亦棲薄之所悵也夫中山之賞皆擅名流南  
澗之情猶多慷慨琴樽落落遐心何從居諸攘攘奇懷盡

破况以勞人之生尤增他鄉之恨十日促膝寡平原之歡  
千里命駕無當時之驛朗月不來孤煙長抱斗酒今日桃  
李留陰望在南山之南北山之北飛步天末言念君子百  
年雖短悲胡能已若茲園者亦農夫五畝之宮也徒以積  
阜作勢因水爲奇遂使林壑增其異色汀洲藉其餘韻憑  
眺者有古今之感流連者有悲樂之殊彼所遠託豈泛泛  
哉吾人之覽於此者能無悟思乎因各賦詩而繫之序時  
則嘉慶十八年癸酉之三月也同遊者爲吳江吳育武進  
李慶來陽湖周儀暉儀萬儀顥管邇羣大興方履錢凡七  
人詩若干首

周伯恬詩集序

竊聞平陽逸奏雲谷和風八律載宣七鬯斯永斷雷門之  
鼓凡響皆沈登郢人之堂楚飲不復所以追琢神思含吐  
懷蘊煙霞爭彩金石助奇代旣嬗及流音漸渺握靈蛇之  
尺珠騁驟曠於千里雖光溢乎後乘塵駛乎前驅而志有  
盛衰聲有大小陋厥古觀靡於新韻裂錦爲華惟工雕鏤  
取材失慎鄙於俳優戶執寸編家傳百箚揚雄是以有小  
道之嗤劉勰是以急明詩之辨也至於精駭遐馭心遊芬  
苑引墨自合運斤易施振微播烈斯其尙矣吾友周子伯  
恬娉節外昭修能內茂虛翻已勁久峙青雲華姿無倫終



隱元豹浮邱挹袖重孝綽之清儀蘭台絕塵推彥升之蘊  
藉瓊瑰映於江左鸞鳳暎於層霄杼軸典藝發諸觴咏一  
室自得揆藻於天庭十年操觚綴端於青簡偉麗之兆有  
可言焉則惟南軒晨張北櫺夕啟坐圍形籤几拂璠管淵  
情揖睿哲之徒冲襟攬江海之契八儒三墨馳赴腕節一  
唱再嘆脫穎齒牙含毫嫵婉翹首綢繆碧薜匝牆芳華在  
樹風雨之夜清琴初調樽酒之前故人獨往悵候緒之闕  
寂益踟躕於予懷欲抗袖而緩吟遂放言而不已又或太  
冲延賞開咏史之流醴陵繁憂多則古之什月且千載使  
撫心而悲涼孕育百家爭聯手而款語薜蘿美人之曲招

楚臣於瀟湘芙蓉初日之篇近謝家之池館魚龍雜舞陵  
壑齊鳴吹笙鼓簧我黻子佩往軌之所相答結綆之所自  
娛至於鬱鬱不樂遲遲有行歸辭干日薄遊萬里駟玉虬  
以遐征駕蘭槎而直上乃躡東岱之巔問河西之渚赤城  
竊窕遍摩秦室之碑劍閣崢嶸獨喚蜀王之鳥垂星在袂  
奪雲入懷瓊巖留題玉洲聞嘯句成秋水寄迹馬蹄筆隱  
春霞新迴牛渚靈運之雅律川陸惠其無窮郭璞之山經  
神鬼居其大半少時壯概讀之而魂飛世外奇言編之而  
心懾者矣因而挾冊出走正襟而來京洛之浦秘簡傳觀  
公卿之間咋舌相告入阮瑀之座十萬縑而先韋侍孔融

之杯九千言而爲贅柏梁合製鏗鏘噤壁之諧南皮勝遊  
喬郁山雲之起終朝所咏人盡輸籌旬日少休錄已盈篋  
涉獵之盛尤爲最雄若夫芒村秋早蓮陌春低湖頭棄珮  
顧影湘君峽裏牽裳怡神織女左徒瑤情通於日下流波  
翠瑟何事人間桃花驂冷贈子以木蘭楊柳橈輕思君兮  
逝水則有將離善怨芳草含光譜錦歌殘迴文序短宋玉  
傷心之賦秦嘉寄婦之章莫不泣沆灑之征鴻和洞庭之  
淚鶴豔骨猶憐餘香未祛其瓊思也若此其摛藻也如彼  
雖紫鳳之英辭碧雞之雄辨舒向淵海之宏機岳丹青之  
韻皆已執策遜其風標挾楮嫌於篆刻也自壬子歲訖於

乙丑曰惟雒齋集凡十卷自丁卯歲訖於癸酉日之福居  
集凡八卷昭明集富纔逾壯齡會昌纂成尙多後錄時行  
時止追伶竹於蒼囑愈唱愈高奏洞簫於天末日之方升  
銖之益累長寫不測亦孰知其所抵哉然而攬申椒其不  
芳惟蕭艾之匹也望鴛鳳而戢鳴亦鸞鳩之好也顧盼萬  
古俯仰天地長袖善舞短歌易瘖中年哀樂過太傅之沈  
思身世流連同開府之多恨依遲春日曠放江南對飛花  
而銜笑聞流鶯而感時歡筵並坐五日無聊魯酒獨持三  
星未落愁賦初罷越吟乍舒早有遐心以永今夕此何故  
也斯其悲矣夫以吞吐河漢之豪摧折迴飈之勢持撫賈

董之行詆訶曹劉之作蹴九華而西傾抗八極而東覆搖  
筆而熊羆晝呼發聲而蛟鼉夜走乃志士之盛概文人之  
逸情然能退藏於密處盈於虛引和宮商酬應韶濩情之  
所極則言無不周意之所通則韻無不茂報星漢之昭回  
視風日之駘蕩則蓬山可達不羨尾閭芸觀爲羣甯誇下  
里豈不至哉是所望也蒙也幼睽圖史長慚淵藪雍門肆  
響祇愛繞梁瓠巴安操惟知仰秣以山陽之款密識元凱  
之平生命書集首因志儻詞亦惟南斗晨暉揚粃粃之先  
導黃鐘初應舉瓦缶之虛聲云爾

問潘念諶疾啟

念諶足下近阻令儀遠閱寒紀一再奉謁辭以匿風慄懷  
不達悵然遙深比聞足下宿疴將解滋神惟久重閨晏晏  
屬此日月息憚媿媿遺我友朋資滌齋忘當益澄慮所業  
興廢以何遣時昔枚叟之發未七而楚貳眉舞洞簫之賦  
終誦而漢儲心逸足下清襟勝託必無耽樂之虞徒以劉  
楨養疾歸卧漳濱桓譚苦思疹患時作乃有麗詞紉繹妙  
義相循玉屑晨飛金音秋舉登阮瑀之堂奪樂廣之座驅  
煙墨爲聲辨縱倂來而置郵斟理洗嘲竦論破元式譎式  
阨靡朝伊夕庶可失此風欬益其神智則僕方從事於此

且爲足下執塵而前也協洽次闌幸鼓糜螯蓄彩展慄青  
鳥明之

潘念諤誄 并序

潘準字念諤常州陽湖人也以嘉慶十七年三月二十八日卒年十九烏虜哀哉夫春槿隕華自幽於中谷適枹堅質不樹於蒼淵殤耆之倫惟委靈轂損益之端無舉斯世人生不匱冥乎未聞若乃山雲摛采銑露降英荆璆孕而璞輝豫柏挺而巖秀固已踵謝睿哲揮挹寰區而使列飆摧柯斧斯毀壁昔顏氏短折傷好學之無徒賈生誦居悼壽命之不永先民不作後起誰嗣烏虜哀哉君少不好弄長有遠度丰神鏡朗志節淵沈未屆十載能通九經文章百氏淹若夙貫賜書滿家得石渠之祕振筆舒藻擅雕龍



之名猶復隱迹一室研精窮年寢懷鉛墨穿幼安之藜牀  
口茹墳典亞文通之流麥竹籜之書寫已盈寸戶牖之箸  
時復成編雖琬琳自晦而盛譽普宣矣君以弱歲卽喪母  
氏每懷風雨泣奉柩捲誦詩卒業竟廢蓼莪入室靡從不  
歌華黍令名自傷字曰念諼蓋志痛也年十八舉秀才嘶  
向日之聲初馳方里鼓接天之浪始垂尺鱗乃未三月而  
病作病五月而竟卒哀哉凋碧玉之神樹銷紫石之靈根  
卷施抽心甯解宿莽之恨龍門死桐尙抱咸池之曲共著  
書若干卷手錄書若干卷藏於家不朽之業其在斯乎予  
以昨歲息影故廬奉夷甫之塵談接平仲之縞契昕夕論

經沿溯伏鄭甲乙飛辨錙銖曹劉下至遊藝璇紉之祿旁  
攷摛史之章前籌固遜附翼足豪天平不諒喪我良執烏  
虛哀哉夫誄以表德言以昭緒爰是述其茂美託之旒旗  
乃作誄曰

僂僂者天促促者命逝矣之子悲來胡竟孰嗇之壽孰馨  
之名匪名之馨來茲是型伊子之生碩宗鼎盛清芬允貽  
名德終令蔽芾棠陰興誦循政奕葉隆譽世守廉敬爰襲  
苞蔭克揚前庥金枝蘊彩瑤系餘修惠質早端聖童是侔  
詩禮庭詔勗哉箕裘枕旌經籍窺息名理文耀冬霞神澄  
秋水詠契莊騷參悟元史談塵一揮蠅吟怖止子之勤修

夙夜詎甯盤盤一編如影委形銳志砥礪靡思不深照用  
菱莖心寫晶瑩子之持行不激不隨道潤斯華德充乃滋  
婉變登堂孝友可師翼乎維度確乎維宜子之令儀鳳翥  
神溟若華四照澄波萬頃穎寒骨儉迺帝警巫陽有招  
曇雨成影烏虜哀哉琅玕舊題匪子誰燭黼黻皇極匪子  
誰勸匪直也人邦家之綬荃蕙質芳元壤是促白雲停彩  
朝陽在門如何不淑闕此英芬漢宮有木錦水有鷲如何  
不傷望子潺湲子身可亡子名不朽名山之業不脛而走  
恨滅北邙氣高南斗廿年千秋百歲亦苟惟念素執周旋  
無由玩復遺文永以綢繆雞鳴粵粵零露載憂魂兮遠逝

懷思胡瘳烏庠哀哉

送趙林一序

嘉慶壬申八月趙子林一將北遊時則秋陰滿衣午涼在樹蓼花艇小杖履可容稻雨波平舟櫓悉啟卜日惟吉倣具以行其友方履篋載樽酒而送之曰昔人北林之造泣或損臆志士南浦之歌錄已盈笥誠以絃括之曠眷戀深於白雲參辰之感積憂明於丹鶴滄海遠道十年有思馨香闕懷千里誰贈臨河太息達者未免矧吾與子能不加歎吾自弱歲辭傅卯角謀交西謁隴荒惟覲塵迹北走燕趙至於上都時君昆季羈客於此請贄未暇已篤心誼執袂道故乃識舊姻徐摛形弱依周捨爲外兄范縝矜才比

蕭生於愛弟牛車道上擁背忘寒客帳宵中論經靡倦傾  
蓋之始稿幣尙焉旣而白紵拋殘黑貂告敝勞轂短短將  
侍宦於秦川驚沙濛濛棄知心於日下於是斷魂隨敬轉  
疾於奔雷悲吟接天聲溢乎河曲束箋一寸不消季重之  
愁嘉言三復盡入洪喬之厄如此寒暑若彌年載而泛梗  
所經復逢故館求志希獲無異曩時遂乃倦遊辭返並轡  
歸來入林宗之里朋儕遜其連裾登伯符之堂華顛喜其  
得友居鮮一日之隔門徹半介之通跬步籠迹暉影振華  
齋居盤盤言笑宴宴蓋同息大江以南者不自知其歲月  
之更也然而緝弧之用資良治以成膠笱玉之生望他山

而援手與典可尋諮孝緒於鍾阜令言聞往就少傅於東  
甌蓋嘗風雨破夜危論若師幅巾終朝逸思成陣志荒所  
業則振襟以悟之擇交失端則微辭以導之素絲白羽染  
采因柯露木風榮臨年共悅此神契之道無愧也哉今子  
將揚蜚聲邇上侍揖金辰硯玉岫而余奄滯故廬不克企  
軌今日之別我勞如何吾子行矣躑步不休跋鼈千里累  
塵不輟岱岳崇成以勗明德爲吾子箴鉛刀雖貴鈍於莫  
邪五味雖甘不先稻黍榮利之誘毋以徇取久穀干駑亞  
於一駿籠樊之鶴六翻終奮賞音在人益已惟敬審友之  
道爲吾子進吾子行矣舉策而告者謀夫之英贈言而退

者睿哲之範爰敢綴述往契期誌後腴凡百悠思神與子  
借



江行記

歲入元默月居陽首方子將由金陵至於漢陽乃泝岷江  
別沱水擘洪波指太清纓溟甸呀呬渠濬洩湫澗沖  
漚沉瀆初映曜輪砥如重簞乍激迴馴盡見層巒瞬曉少  
舉可撫萬里雲天相迨曾不一尺於是霽光在枕晨颺上  
衣舟人羣呼客子驚視赤潦拍蕩垂腕能接黃霞彌漫障  
袖欲飛蒲帆揚鱗吼音終旦筒篙森刺浪勇欲奪走電謝  
遲勁矢忘速孤鶴無影哀猿有聲邊笳四起沈霧干仞地  
軸爭峙至此而遙則東望棲霞之岫西眺彭澤之陂指鸚  
武之洲揖鵲尾之渚莫不俯臨前席追攬後塵散魂凌魄

浮彩驚思洵穹寰之奇觀平生之盛遊也徐理襟幘低憑  
軒窗一編將展奔魚駐而竊觀狂吟遽伸鳴鼉爲之起舞  
偶有所作濡函未竭洪波潑渙鼓於几下削葉投之駭退  
十丈往昔嘯歌好言激壯讀景純之賦吸怒濤於吻沫考  
道元之經摧逆流於握指以今况之誠異曩域若其浩颯  
所盤陽侯所牧通滌之所遺溯遐溟之所泚潤鳥不及盼  
魚不暇充圍彼瓊巖易於整敦淵洞八荒若灌若疏蓋千  
萬載而無繫帶爲之輔者百川豈能偃哉旣而寒潮緩升  
岸草盡失葦枝迎拜惟餘素塵水氣上驚半作絳綵金輦  
斜遞左右若木華琚低映中環太空又復激瀾作食借石

謀居菰米欲炊奇芬墜於蒼冥濁醪橫前餘歡達於鄰渚  
宿雁戢翼招其逸侶江豚掉尾時甘嚙人挽首遙望汀洲  
無際顧我鄉國隱於天末容足之外卽馮夷之宮瞠目而  
觀非蓬瀛之客日落未落招美人之菱花道阻且長傷交  
甫之棄佩思緒闐寂悠悠何如嗟乎人生之質非金石所  
流百年之期非風雨所破而欲閉室間之雀息挽天上之  
榆星不亦惑乎今雖單袂孕雨雙屐分虹碣岸突下噤不  
敢吐逆濤積湧恬不敢吞奇懷夙砥非達士之憂慄也述  
其所覩因以志之云爾

與江神牋

蓋聞停法規尺必有委蛇之司谿阜隆步不乏舉夔之長  
是以援瑟而鼓泣下湘靈牽裳而來風迴海若冥契之道  
惟誠斯通矧以滂渤表采頤淡蘊真涕泆淮頓疣贅漢泗  
瀉汗六洲之域浩蜺九衢之中柱元極於華裔限坤靈於  
帶彌世所沛欽如江之永者哉伏惟執事潛曜康濶翱翔  
神渚巴梁緝瑞匯眾瀆之原巫峽宣機總朝宗之望璇澗  
春靜紫貝爲門桂嶼秋高黃金成浦肇益崑崙之選足雄  
屏翰之儀况復崇朝而載利涉蒸黎沃野同流布潤映畝  
啟介鱗之萬品承蒼溟之四隅楚津三月桃花浪開沅芷

十尋芙蓉波細窮陸無纖泊之遺天區有靈湖之濯利舒  
功耀渺不可推履籛以朔方餽士炎國僑民學愧迴經行  
惟驚守湘輿技隱無送目之名綵輪工淺謝歸風之價今  
忽沾航遠泛結展漩游遂循河澍臻茲大澤凌茅水宿已  
逾十晨鼓棹風吟安於一葉旣異潛臺投壁之雅終儼靈  
均懷石之嫌馳驟如緯誠復不憂惟是七箸之前並羅典  
冊長缺之外別貯圖書默坐畏寂輒喜恬吟走筆少休又  
能狂嘯自朝迨夕曾不虛時而或澳府駭其騰聲波臣惡  
其逆耳竹艇三尺云非儒生之廬洪濤百頃乃祛狂奴之  
態愆尤相積是所不虞故敢達諸明神抒其幽素可協假

道之請不罹突至之譏庶使破浪有期告水濱之列族布  
帆無恙謝江東之故人撫膺拜覬腆顏載陳黍稷非馨楮  
帛虔頌謹啟

祭莊印山夫子文

嗚呼崇岳失峙朝陽停輝昊天不憖景行曷歸德純而隕  
道隆而微吁嗟吾黨將安所依惟我夫子鏡華毓秀世載  
通德克紹鼎胄璞潤燭山珠瑩媚川岐嶷之生惠質早宣  
爰自初服束躬儒軌伏業孔門遊刃諸子軒墳輕典匠史  
宗經發爲文章炳於日星探討絕學綴拯微言上下萬古  
奕奕淵淵望影附形聆聲和響令聞顯昭播於九壤匪文  
之肇道充乃滋匪名之馨寶耀所施仁哲溫良中朗外澤  
孝乎惟孝友恭是則猗歟夫子命世而生式登廊廟功曷  
可名迷陽載途驂駟失路用行舍藏進退可度高蹤碩望

升聞於朝三事大夫子子干旄素纁良馬再徵不起羣  
舉有道上貢

天子赫赫

王命賁於邱園鴻逵遠蹈犢車高懸迺錫赤綬俾全隱迹  
棲遲衡門終保貞白恤茲後學蒙不知途晨訓懿行夕治  
典謨春雲在堂時雨在座詔誨小子勸我迪我丹鉛橫前  
質之晦明親炙有謚私艾載傾如何上穹不淑不弔景命  
永謝徂此遺劭嗚呼哀哉藏晦以密正用以蒙嗟嗟夫子  
允履厥中其來無倪其往無涯太和同流人莫之知撓之  
不濁澄之不濇叩虛抱寂若波千頃迨乎易簣安志豈神



啟予手足悠然韜眞蘭芬而刈泉醴而枯梁崩嵩摧云何其吁旒羽秋高總帳天促千秋誰嗣百身莫贖繫予蒙昧同侍經帷服勤未逮心喪空期素琴留御書策陳几終其永懷悲何能已敬敷奠詞生芻載將嗟我夫子鑒此苾香嗚呼哀哉

祭周劉雲文 并序

歲惟元默次於大渚周子劉雲卒於漢皋之旅嗚呼駛電  
匿影沈月不光菁華汨於崇朝哀忱起於中夜龍蛇之厄  
抉十仞而泉飛夢雞之辰叩九閭而星落應汝南之著作  
不名其官吳季重之善愁終之以命啟文園之篋封禪之  
書將亡披子雲之帷草元之心未化嗟乎滔滔逝水不能  
駐金石之流冉冉行雲豈殊於蜉蝣之瞬惟當世以誰懟  
假大地而埋憂達士之寄今乃言旋勞人之生誠不如死  
然而摧千尺之桐竟先撥其枝葉刈百畝之蕙又遽傷其  
根亥安仁悼逝之時未周於歲蘭成傷往之作不絕於書

匪朝伊夕掬瓊瑰於盈懷跼地躋天恨尺蠖之無足拓落  
寡耦崎嶇損歡入室靡覩出門何之藜蒿泣雨圍十口之  
棺茅簷坐霜冷三生之夢望故鄉而不見類飛蓬之焉如  
因其伯兄宦於嶺粵將往依之未及至也悲秋羈舍殉之  
以身躡躑冥途欲迷其徑枕函簡而長謝御布衾以永休  
十干市木未知視斂之人萬里停輿定多欺貧之鬼寒煙  
夕卷斷葉驚飛鄰笛乍起卧白骨而酸魂生芻載將以蒼  
蠅爲弔客人之生也死固其所死之爲累乃若是其淒怨  
乎歌薤露以何時仰昊穹而莫答所謂修文繼職玉棺降  
空賈太傅之賦鵬王子猷之亡琴千悲萬恨何可勝言一

號三呼魂終不復以今况之增痛靡已既卒之後更閱一  
載其友人之在京師者始克知之素車奔赴同慚元伯之  
靈寶劍初鳴難覩徐君之塚因儻其夙寓爲位而哭懼神  
遠之未格也乃爲文以招而祭曰

黃雲瑟瑟丹楓湛湛魂兮歸來念此夙忱惟子之生志度  
洲粹荃蘭之姿爲世珍瑞既有令德穆於清風既有丕文  
侔於化工秋水照神春霞麗物良璞在躬其彩焉拂莊元  
之誼銘衷凝素發言彪炳爰談爰賦時之不達道屈未伸  
百治之銑乃棲埃塵命之不淑幽閔其世遭家不造終屏  
憂悴載駕我車於陝之鄉載依我兄於嶺之陽崔嵬其愁

馳驅其怠運極命衰隕越爲害涼沙掩旒窮月寢肌朔颯  
一來靈魂誰依名山之編藏於足後嘔心而亡繫子是咎  
子之家室盡汨重泉潛質相晤慰子後先楸輻未安魄苦  
相近魂其久淹湖湘之境友恭是則思兄未忘魂其有知  
隨流而颺十棺之穴兆於隴左魂其遠行或侑或妥少微  
作芒離離晨嚮魂兮歸來歸於天上惟我素執判袂有年  
渥彩懷音夢寐是延求之不得泣涕漣若乃灑桂醕藉以  
清爵斗酒隻雞酬於三步迹徧湘干珮捐澧浦神颺肅然  
髣髴載欽鑒此明潔魂兮來歆

書劉芙初編修駢體文集序

蓋惟泗石在懸自殊凡響涇沚合浸獨著瑩流抱孤芳而  
不前振遺緒於往昔文章之道厥有尙焉奇耦相代象同  
於天盛衰迭蒙降因乎世應劉摧於鄴東鮑庾渺於江左  
雜沓莫正泆忍不鮮寡能推源安所終極夫文以道勝言  
以氣雄子建所謂儼乎若泰山勃乎若浮雲迺君子之作  
也先生銘衷凝素抗躅夷庚養恬而奧義皆宣機清而妙  
理自發茲駢體文一卷抒華千載啟韻百家句非春日流  
紅有花詞擥晚霞茹碧成彩河梁載酒情深送遠之章湘  
雨留人悵觸論文之夢展其幽思可裊絲桐纈其芳瓌若

列錦綈不錯於雕鏤之工不逾於性情之外洵操縵之津  
途爲學林之衣鉢矣不諒下鄙錫之楷模秘觀珍賞如渴  
飲而饑餐吟誦迴環欲編離而字滅徒形慙沮敢肆掎摭  
謹列圓丹助此光豔並志行墨申我景懷

送董晉卿南歸詩序

癸酉六月晉卿以就試至京師後遽聞其尊甫定園先生有疾匆促將南歸是時余與晉卿之晤合者未周夫二句也離矜乍伸盍簪已卜優渥晨語徜徉夕行惠迪之勗迹同筌蹄清機之盟鼓若琴瑟短晷偶疎顧失羣而增悵廣坐列論引良儔以自豪又復遲子玉燭沾我金罍款曲薰風延佇朧月敦交求璞抱實詆名結懷周秦剡思商夏奇文十冊入夢寐而皆吟古彝一銘撫神物而駭走振青蘭之訊風雨未來聞白雪之歌蒹葭莫賦非遊誼之爲樂將德音之是招乃忽疾雷緘怨飛雲流陰驚沙十丈不迷其



途芳草千里轉趣其轂嚙指之誠北溟亦爲之倒瀉倚閭  
 之慰南國且見其歡迎登山臨水此日無言蕩魄越魂送  
 君有淚吾子行矣我勞如何河陽解纜異於曹植之詩春  
 水牽裳欲廣江淹之賦以是言別何其悲也至於載觴祖  
 道停陌行筵南皮之遊金谷之送皆古人之有懷非今日  
 之所尙也乃爲詩以贈之曰爰折瓊枝揮子駕兮爰刈芳  
 楚秣子馬兮君子之行瞻親舍兮咳中有芝術可采兮佐  
 爾晨羞以永歲兮庭闈悵悵眷樂愷兮江漢之流日夕遠  
 兮豈不從之嗟弱翰兮送子賤軀適我願兮瓊珥雖榮闕  
 顏色兮靈籥雖和瘖聲澤兮悟契之殊將誰悅兮惠此璠

璠無終惜兮。

誥授朝議大夫甘肅鞏昌府知府護理鞏秦階道胡息齋  
先生別傳

先生諱紀謨字獻嘉浙江山陰人也寄居直隸通州遂入  
通州籍王家江左百代仰爲清宗陸機東來當世重其碩  
望先生秀質嶷生見者自遠風神軒舉迥然不羣授元幼  
日旣探奧義躡屩壯歲乃推經師奉菽愔愔窺雲闈之顏  
色采華粲粲陟芳帖而懷悲先生於未衰之年痛摧二親  
迫家食之饑尙客千里視寢視含惟資弱妹不恤不帛罄  
所遺藏外人皆爲先生傷之而先生哀踟躕之莫從勵友  
恭之愈篤時有外姻某氏以閨闈之怨構角弓之訟聞先

生風愧惡而輟沐蘇瓊之化相揖均田入王烈之鄉皆恥  
爲盜君子潔其身而同者合振其采而鄙夫寬豈徒虛語  
迺今知之又嘗僦舟北行羈遲旣久同濟者數十人皆告  
乏食先生竭資以頒始盡獲免貸而不書訖莫知其名族  
義非所市終不答以里居南山之壽爭頌潘耶青麥之謠  
旨達莊老慨恤勤施罕有尙焉迨於一尺之符筮分天水  
五幡之綬遠登玉關志百鍊而不消御萬仞而必叱才辨  
無雙則羣司傾座粲爛日下則蒼庶悅心是以量移數郡  
遷宦廿年蒞成縣鎮原安定中衛諸邑陞授安西直隸州  
知州庭有和風縣無逋事政成三月延頸者遍寰封星改

一方阻輪者滿行轍先是逆虜縱軼弄兵潢池妖氛蔓延  
問途隴左旣已折馘將謀會殲先生憫彼脅從及於耄稚  
錄請別減盡釋其辜而鳳翔之妖民雷得本等又將驅惑  
以應先生奉檄治之至則呼彼都之牧令借此邦之父老  
酬酒於樽列樂於座咏山中之風土問行畝之東西而輕  
騎倏還渠魁已得夕陽尙紅酬醕映碧眾皆大駭始知嘯  
歌於長吏之庭決勝於賊人之室邳彤機老全解嚴城之  
扉謝傅神恬速展前驅之甲外戶無扃兵威夙閉先生之  
勛蓋銘太常而無愧矣於時

天子方考九輿披八索詢河流之異證傳註之誣知清濁

之滄於涇涇也

命大吏求其源大吏以屬之先生乃登首陽歷大夏踰終南石室之險溯鳥鼠同穴之濱至於涇州之拜頭山得涇之源焉瑩石如瓊可析豪髮澄流若鑑安雜滓汗爰著涇源記一編以獻於

朝此則鄒衍豨轍謝神經之未詳張騫浮槎慚斗牛之荒渺者也未幾擢鞏昌府知府攝鞏秦階道將期經綸彌廣响嘔益深泉冽玉漿案陳瓠脯豐五雞二彘之養致千耦萬箱之樂孰知台職未崇良臣不憊年齡俄頃風電相推郡中赤土惟封半篋之書關上青泥難易十旬之粟豈不

哀哉先生頹廢而隆髯疏而挺朗朗鑒物爛爛增彩葆光  
含息天倪往來自云中藏常軌元經咽華阻氣之精鼻浴  
鷗視之要旣而思真宰之契不外市朝神僊之洲莫非道  
岸因以束髮還嶠折簪入世又自言曾爲冥曹剖決陰獄  
泰山使者攝生人之魂地下主文當強仕之日蓋共凝壹  
之氣六合同其陰陽純直之心九幽受其陶鑄列子云上  
闕青天下降黃泉劉安曰馳於方外休乎宇內若先生者  
可謂符之矣且以識貫遙邇學粹古今毫翰爭飛金玉相  
儷春日初午聞高吟以入空秋山乍晴喻清抱之在室著  
有知足居詩若干卷言山澤之性靈布六文於六律繪閭

閻之饑渴皆一字而一珠豈濡脂染墨者所得同年而語哉履籤幼侍嚴親官於甘肅先生與家大人交相友善見履籤而愛之選詞爲駢走箋命和掄揚不絕於口保抱不離於懷十紀之童攜之而並列耆宿一韻之美咏之而遍駭公卿子春之旗鼓自當管生周君之塵尾獨資袁憲嗟乎生世落落窮年悠悠斗筭之才亦妬乃周納其狂名跬步之階未登卽指目爲賤士白眼環於左右雌黃密於網羅則惠我辭色榮過於加華袞知已片言恩深於肉白骨也而况先生之於履籤者乎丹泉旧地悲無時之可忘白雲在天亦何人之能述謹綜厥行略志其遺美爲之別傳



所以風來禊之措模備史乘之撿采云爾

沈貞婦繪古圖贊

并序

夫鴻都設彩躋想聖徒蘇門行障貌求逸士蓋高躅抗雲  
拜圖中之千古遺思往日增頰上以三毫染翰所推傳神  
阿堵未有明閨妙韻幽居素懷丹楮欲飛翠霞未落縹緗  
在手若開怨雨之花筆鏡臨窗不寫傷心之賦明駝萬里  
繪寒士之裳紫雪百尋灑穹廬之血林下之風氣道韞遜  
其鉛華陌上之冰霜羅敷驚其妍藻洵足寶此芳幘永於  
來禊者也况乎懷濤之臺青蛾欲化漆室之豚白燕初歸  
畫以人而益珍節因才而乃見則伐彼貞木將鏤少女之  
形集於瑯環更上伯姬之頌矣乃爲之贊曰

錦帙入座寒香上樓松枝影碧石匣疑秋鵲啼  
倏忘蕉心  
罷卷夢裡紅牙袖中彤管笈囊獨佩秘苑初開  
江南寥落  
古月徘徊

答劉青園書

青園足下北土凜冬勁颯驟起僵坐斗室瑟瑟不甯忽獲  
惠緘驚喜失望陽虛之降迴谷凱南之鼓芳甸不是過也  
書中款款撫此心曲循誦百周覽照一室且知足下寢食  
多豫定省以床甚慰甚慰間者寇發近畿蔓於東國封豨  
夜走毒獍晨呼星芒動天月魄匝野比聞青州之區將士  
致命渠魁就殲蒼黎無恐而豫南數郡尙有逆徒未卽授  
首此如鱗魚掉尾養以沸鼎窮鳥亡巢棲於烈火剋旬指  
朔可待靖矣方今四宇和甯中外受化頊堯穆穆於上皋  
夔師師於下一夫之安勤於宵旰三尺之子舞於康陽而

凶狡潛呼鉤連結轡持耨鋤之器率蝟螿之鼠乃欲蕩搖  
我家室虔劉我邊陲扶桑未浴乎咸池金鉤未登於鷲嶺  
曾已裂膚陳肆折馘囚屯沈迷猖獗以至於此夫以天之  
仁不能無厲整之鳥獸地之大不能無沴毒之草木而太  
和網緼之覆廣運滄茂之載終無所累適足痛恨耳泰山  
以南連紀苦旱災傷流離重以兵患民之瘡痍諒未能復  
丈人敷政斯邦爲之豈弟恫瘝乃身刑期無刑而足下子  
舍可居嘉猷克輔相與頌者豈維故懷籓也辭望閭之親  
應棘省之試褐衣猶存傲屨未釋初無勝人之資而欲凌  
人之上所齎薄而所願奢宜其黜也友人余君鐵香九江

之翹英也亦擯京兆出參幕府雖無班超封侯之志雅有  
稽喜從軍之心才藝絕倫兼工手翰忱思慷慨篤於友生  
與錢之交不啻籩之與足下也審交必端足下其弗遺之  
聞君吉人縞紵已密胡子曩季親若同生相與勵躬明德  
採涉文藝惟望足下能來同之少有罅時速慰遠慕沍陰  
多寒幸善自衛不宣

綠玉詞序

徐君經汝秉淵睿之器懷醞和之行樸學自勵卓德不羣  
仲舒之圃三年未窺智深之家五日不食心鏡典籍伏鸞  
隱其名識綴篇章雕龍擅其彩洵可以馳踪儒軌蔚炳國  
華者也稟命不融弱歲而逝豐厥英聲咨此永祿瑤圖乍  
披清芬終沫元經初寫風流已枯芝蘭焚質室有餘芳卷  
施抽心庭無宿草哀哉凋碧玉之奇色銷紫石之末光閱  
千載而猶悲雖百夫其奚贖遺文百首友人緝之鳴鐘在  
水尙動知音孤桐摧根久翔逸韻抽翰之暇旁及短調嘔  
心之言徵於將亡此綠玉詞者亦劉遵之碎璧也流連時

遇默感窮憂詞飾煙霞志悲風雨幽香入袂遠泛春波豔  
骨若仙怨遲明月簪花舞曲並見迴腸載酒吟樽難消愁  
氣是則汨羅未返先成懷石之歌賦鵬將終已類投湘之  
哭者矣自君厭世每握斯編介歡筵之欲闌招君子之舊  
侶各舉穎辭同爲妙賞此唱彼和盡屬變徵之音長吟短  
呻遂激清商之怒魂荏苒而攄碧泣嗚咽而流丹撼山陽  
之笛湘竹全瘖遇黃公之壚玉山易倒明河一尺溼雲干  
圓庭樹迷離落葉橫亂斷猿相答悲鳥驚飛寒燭之背疏  
櫺之罅如見形影唵映殘席痛呼不前相卽無覩豈君之  
神魄尙有繫於此乎起九泉之枕未忘斯人穿十步之隧



欲問今夕冥誠之感未可知也履錢少鞿隴末偶歸寓邦  
迹同閉門心如合轍與君之交久銘中懷問君後言亦愛  
蒙陋縞紵乍契晤遊無多忽聞溘亡悔念曷已茲有薊城  
之役深感宿隴之思因舉小集先付梓人秦瑟引吭聲初  
肆於宮商楚劔埋鋒光自騰於牛斗有傷寥落伸言慷慨  
乃作此序以冠其端嘉慶十八年癸酉四月望日大興方  
履錢序

郭烈婦傳

烈婦姓鄧氏臨海生員郭光璋之配也淑蒞之質遊馨於  
初芩蘭蓀之芳賦采於中野惟珩與璜容止不墮聞機迨  
杼令華可昭擢根下里夙仰摩笄之山習誠孤宗幼入扶  
風之座出閩之年歸於郭生和諧媿影婉變將雛歲有元  
枵天平不淑心傷寡鵠之歌腸滿啼鳥之夢湛湛誓水湮  
古井而不瀾呱呱在懷裂貞膚而餘血羅疇冰槩實此遺  
孤黍室霜鐙依於母氏蓋將茹恨罔攀冀成立之日形影  
相弔續已枯之魂者也乃以五載久延百禍未悔文叔之  
妻方少長卿之子先歿烈婦旣莫號於蒼穹決相殉於下

地闔戶而縊尙未就奄其母知之抉關以入里俗之論每謂解縊必得少壯布氣乃可復甦母故惶遽遂呼鄰人救焉哀迫於中謂嫠也何害慈昧於道招將伯助予烈婦且訝九幽之可還痛再生之愈切詢得其故憤結莫追卽取交刀自鑱其脣置脣從容而復瞑逝哀哉肌膚之愛薄於名節鏤割之傷不聞慘怛是誠泐金石而不渝蹈白刃而不辭者可謂烈矣聞之者色驚知之者心折而自亡迄今逾五十年門無奇行之表臺無懷清之名微纈闡幽曷云能思且夫貞姬之頌代不數人偉躅之傳史不絕紀如梁媛斷鼻以自伸夏侯毀耳而明潔禮修塗而之智段紀截

指之誠尙矣彼數人者豈皆視糜骨以爲甘仇已膚而必  
墮哉誠爲志不可以苟屈污不可以少存也吾嘗以爲仁  
義無恆履之者至順貞麻非閭宅之者至堅迹險而理乃  
安未嘗有駭世之衷念純而操自厲未嘗有徼天之幸若  
烈婦之行豈求彰彰乎然而

國家飭俗敦風言旌行擢井閭令聞之遺必達於上  
殿陛敷榮之典必洽於下是則搜采貽芬顯乎志乘者固  
有司之職也而表揚絕德被之絃歌者亦士大夫之責也  
罄北山之石徧列豐珉削東海之筠全貽煒管庶可光斯  
隱徽激彼貞風焉贊曰

寒雲入壑貞柯不移逝波淩川精禽何知貞柯雖頽郁條  
猶樹精禽雖呼冤恨莫補烈婦之生荼酷夙嘗烈婦之死  
慘厄載傷脣不可存吻不可嚙母兮天只畜我不卒非母  
何愛非脣何污脣而受污脣非我膚維脣之亡厥寒在齒  
維婦之生爲母之恥凜凜自矢惜惜全歸景曜飛誕懿美  
何微瀟湘之南無復宿草丹雪積尋青颯迴繞千載其懋  
百世其型願翼禕冊永此嘉銘

王君貽珠香雪圖序

桂林王君芬藻夙流俊詣無敵修綆窺古折屐謝游入超  
宗之坐爭識鳳毛企幼安之名驚傳龍尾湘江之左一日  
馳聲嶺海以南百縑市賦僕也隨宦同於吳祐擇士比於  
法真剡舟交粵曳屬珠方性樂幽尋輒深棲覽暇則眺迴  
遠洲修觀近陸瑤簪玉筍矯立於偏寰碧嶂金潭森隱於  
炎國披煙弄月乘雲傖風思軼人之遲暮撫美景之周流  
愴焉日夕繼以嘯歌而王君敦懷沈素慕交譟野蘭菊在  
室佐公贈彥昇之詠鴛鴦於飛曼季惠士龍之什遐心我  
從雅遊斯篤他日出其香雪圖幀屬予爲詩復乞以序是

惟晨繪希彩悅乎素心夕薰多寒迺有真賞梅花干本或  
悟以前身香草一叢別啟其生面袁安閉關而卻掃王恭  
披氅而行吟蓋妍辭初騁則飛霰滿堂遙思欲馳則繁曩  
染袂若此圖者毋亦傷陽春之寡和怨玉宇之難攀乎古  
人云嶺南千里無雪惟桂林有之則王君之在此都其有  
似於雪也然而遇象能耀水木資其明華靚潔成輝霜露  
亞其陶鑄不僅以皎皎荒闕瑩瑩谿谷者雪之質也請以  
黃竹之申歌幽蘭之儷曲爲子勉之云爾

立魚峯贊 并序

柳州城南有奇峯焉名曰立魚子厚所謂形如魚之立者也飛甍拔天疊嶂委地駁若層鱗疏如健鱗去廬則三里而近涉江則一葦可杭蓋未至其下而曉帆無際疑通仙都鬱拂旣窮尙接丹氣於是刈荒榛俯翳蒼左塗右谿奪虺蛇之徑上磴下曲越魑魅之宮至山之半始覩一洞貫洞之中復得兩穴礪石外蟠溼雲內奮竇有鬼斧壁無鳥蹤芙蓉葺蓋金碧萬殊樛葛爲門絳紫百仞鐘乳斜瀑驚赤虹於潛湫流瓊碎階疑落星於中夜謝客登山之作倒鑄於陽崖杜公勸名之碑駕峙乎巖缺由是而望遂不可



梯竹劍之杪續彩無名棘刺之端飛靈所集故探秘籥而  
莫從怨真宰之有吝也余方羈客遐陬狂搜勝域託情茲  
麓永暢厥觀攀瘴嶺而振衣戴蠻花而自舞孟陽侍宦劍  
閣書銘孫登獨遊蘇門長嘯山中跨鶴蒼梧帝子之魂峽  
裡鳴禽江南逐客之操蓋遲迴而不返益杳蕩而無盡矣  
迺爲之贊曰

終南石闕崑崙玉堂風泉入壑雜花滿梁巖腹鼇棲峯腰  
龍斷轟然翠柱軼乎金漢珠林投僻桂海幽窮傷爾孤特  
嗟此挺雄水僊怯霜明月墮霧穹蒼何險域中何慕蘿谷  
千盤墨天一罇掉影池中聞聲石下琪枝在樹青蓮有臺

皆皆獨往九真未來

宋母曹太宜人墓表

代

永康公作

宜人姓曹氏江蘇元和縣葑里人也大家雅範世東觀之  
文林幼娥孝思銘會稽之江曲維宜人體資淑令德贊言  
容箴盟惟修纂組勤業年十七嬪於宋氏誥授朝議大夫  
前廣東惠州府知府含齋府君之副配也婉變毋違柔嘉  
有則屈節筵侍周母儷其英賢秉心塞淵戴媯溯其風度  
叶蘭馨燕姑之祥徵帷幕泉邱之瑞施衿閨愛爾嫺素  
厥星夙夜重其克諧是以言告師氏歌絺綌之華變彼諸  
姬奉圭臬之間府君投版炎區建麾嶺嶠司百粵之州棠  
陰載路領九真之郡桂檝浮家宜人則衣不純帛翊庭治

之公廉晨起操蒲佐中饋之羞膳履端上日或頌椒觴遠  
道春風能酬蕙錦迨乎外樂懸車內傷撤瑟獨持闔政不  
忝前規采蘋采蘩歲時伏臘之敬俾筵俾几賓從燕飲之  
歡鸞宮三纜更治盤匱雞人一號已登杼軸自府君頤養  
於林泉卽宜人憂勤於家室喜愠不形虔恭愈篤恕以逮  
眾婢媪永無間言敏以承和戚郇尊其容止絜滌滲以進  
娛夫子之暮年陳揄狄而朝當女君之諱日蓋兢兢者垂  
二十載上使期盡無私願之憂下授髻冠以門閭之舊心  
綜其大體安其勞輕重之繫在茲一人矣况復喻義方於  
機績則燃荻終宵貢外傳之束脩則鬻質市一雙解髻

款士行之賓十幅裁衾招孟仁之侶慈教既助子譽益隆  
家聲丕揚人爵斯茂長子棣遠官於山東次子楷遠官於  
安徽版輿未駕尙侍先公象服是宜以儀君子宜人貴不  
忘貧儉惟知足還鮓不怡反金必怒嘗爲述昔年之矜節  
詔祖德之芳型勵其所生期於克紹若乃精俸之貽甘旨  
之獻咸臻於宜人宜人歎曰此府君之餘慶也先夫人之  
惠麻也則必列於蒸嘗薦之寢廟展遺容之莫迫告諸孤  
之成立見者莫不仰其高明化其禮讓焉旣而楷遠移宦  
西粵入慰北堂且欲奉雲闈之顏色重泛湘中棄蠻府之  
微名久依吳下而宜人戒之以宣力勉之以馳驅王尊叱

馭之坂非輕軒所行何武強仕之年非閒居可賦肅雍以  
訓慷慨而道雖敬姜之教文伯崔母之誨元暉以今况之  
不是過也楷遠之官十有餘年霜封報最露布論勳百年  
榆檟邦人能誦先猷

九重絲綸

天子親書上考晉擢方州寵榮將母受茲介福光於前甯  
豈惟絳紗傳學賜號宣文繡幃旌庸封之節鉞而宜人悼  
喪元子劬悴厥躬疾患彌留神明殞歿風電相摧婆輝不  
朗嗚呼哀哉哀子楷遠銜恤罔極增感氣傷視含視斂永  
闕其誠附身附棺弗親其事酸鼻痛骨陟霜屺以何從踞

地躡天嗟王事之靡盬知我如此不如無生泣血椎心不克自宥嗚呼哀哉據狀宜人人生於乾隆二年七月二十一日以嘉慶二十年九月二十三日卒於里舍享年七十有九

勅封孺人晉封宜人子四人長棣遠山東濱州吏目先卒次楷遠廣西甯明州知州次桂遠椿遠女四人皆適士族孫十四人以一人嗣於嫡子之長爲小宗嫡孫曾孫四人將以丙子冬葬宜人於城東天花巷之原近於祖塋棣遠耐焉禮也隧道恐闕幽域將成牛眠之卜風樹愴悽馬鬣之封神光離合辨踊聖室悲棘人之藥藥定省隴中望伯

昆兮渺渺哀窮念極存想音容思撰純誠書於阡兆某與  
次君同官較密心契獨深愴孤禽於海角感春露於寒泉  
懼聖善之弗彰也爰不敢辭而爲墓道之表庶幾勒此青  
珉永昭淑慎禮宗之憲猗與彤史載徵窈窕德象之儀云  
爾



葉鶴巢越雪集詩序

夫言爲心聲心因境遷詩本緣情情以識域集苑枯而飛  
鳴異者歉乎勢也適陰陽而舒慘別者撓乎氣也是以朔  
颯厲則燕鶻舞暑薰和則越鳥翔魏儲論徐生之文嗤其  
齊氣宣武聞郝生之詠哂其蠻語若夫鄉衍居寒谷而有  
回春之律謝鯤生永嘉而有正始之音君子安雅夔乎尙  
矣葉君鶴巢修能內茂道實外冲吟咏緼袍翱翔林澤沈  
博之藝研於蓬樞清麗之思聞於州里其所居也乃泝瀟  
湘之源極牂牁之委柳山峩峩附於九疑象林盤盤媿於  
六管幽人所棲僻壤何陋狎雲景而不言餐沆瀣而自樂

晨眺東溟浴乎扶桑夕臥北窗乃弄南斗釀菊泉之醴開  
荔子之樽景興蒞郡就推前聞子厚謫州猶考近業中都  
大邑之士縉紳先生之徒咸握清風爭趨高躅閉戶而長  
者轍深啟關而問字車集於是誦顏氏之筆瓢歌原憲之  
襟履潛思所至則醴醢可登麗藻所營則厠室皆滿詞鮮  
近韻書多古懷凡厥抗心皆臻絕詣短章振宣城之範長  
言挾拾遺之精淡雅以陶韋爲宗沈寂以郊島爲尙玉微  
金銑方奪穎於毫鋒秋實春華不求合於跬步又或剡中  
訪戴洛下依劉驅山川於腕底譜松篁於筆端撫塵康樂  
洞庭帝子之遊解帶霽均薜蘿山鬼之曲蓋其蕩志也潔

故取物也芳其儲素也恬故履規也峻馳念天雲之際航  
神虛妙之巔琅玕碧風甯戀巢枝瑤海青虬莫垂佳餌南  
方靡曼之音湘中紆鬱之調未嘗滯其靈機滄其雄翰余  
所以讀越雪集三卷而不禁有伏膺之嘆也余嘗慕交粵  
之川巒思荆楚之令士遂緣省宦得肆遐心近自始安迄  
於比景於山則探衡岳於水則涉邕灘每謂桂峯玉笱若  
隱元豹之姿合浦明珠易結騷人之魄許文休流宕之餘  
徒存月旦虞仲翔屯遷之後雅尙風流欲倚蒹葭初其蘭  
茝而鶴巢狂希伯子雜引流波歡託平原定交爾汝賞音  
之誼益友之誠嶺海以南一人而已又復盡寫瓊篇獨探

元味悅槃不飾桓譚諾爲至文雌霓連辭玉筠詡其能讀  
誣諉弁首逡巡久要冰雪鏤心非浮波可衍瓊瑰滿目非  
鋤石可冠聊析微言扶輪大雅藉銘遙契兼誌游蹤

越西江行竹枝詞序

江行竹枝詞者元和宋楷遠大興方履籛南微紀游之作也夫左徒九歌降神君於雲中平子四愁翹美人於湘沚東南具浸之墟天地埋憂之所登山臨水日暮不歸思婦勞人吞聲而泣時則春晝乍陰麗景將謝亂雲生壑落花滿川望孤嶼之縈洞感蒼波之無極客以三月之望新漲乍起瀧濤怒卷間以奔泉舟楫橫浮高於古樹左挹灘水弔二妃之咸從右望蒼梧問重華之不復徑指交川屈伏波之銅柱途出句漏訪葛洪之丹井繫葦而宿棧石爲家肆目修原動駭心魄幽鳥則背葉南飛窮猿則抱蘿北嘯

共傷懷而發涕不自知其泣然也於是鳴笳盡咽朔管徐  
吹晨露未晞暝煙忽破清謳滿江人聲在水舟子一唱越  
女再答青樓大道之歌黃竹成箱之怨征夫西舫有雉朝  
飛少婦東鄰采藍盈掬鷓鴣雞和而迴波興游魚聽而殘月  
下此一境也豈不爾思慨其嘆矣若二人者或道州問政  
重入九疑或高卿覲宦辭歸三楚弭節行路觸緒離襟芳  
草千里若迎岐路之悲清風一來不待雍門之感迺復掄  
流波雜杜若興言彼美駘蕩余心猗靡贈芍之章慷慨雞  
鳴之什庶可代萱樹背聊慰飛蓬載酒屬車同消愁氣至  
於組織鄉謠編采蠻俗鼓名記里舟號指南述山陽之歡

寔追憶平生詠渤海之循猷能書家乘詞雖不類無外言  
情耳楷詩自桂林至太平凡三十首籤詩自太平至桂林  
亦得三十首共六十首爲一卷其所以合轍而分馳者亦  
以見川陸之紆遲嗟我行之良永也是則激浦儻侗船船  
擊汰朝舉薜荔夕采芙蓉思巫峽之女郎悅同舟之王子  
行吟澤畔誰招漢珮之人攜手河梁試奏巴歛之曲